



Assigiinngitsunik ukioqatigiikkaanut meeqqerivik nutaaq Sisimiuni Akianiittoq alakkaarusuttunut ammatinneqassaaq

Tallimangorneq 29. april nal. 15:00-17:00 meeqqerivik nutaarluinnaq meeqqanik 64-nik inissaqartitsisoq alakkaarusuttunut ammatinneqassaaq aammalu meeqqerivittaaq qanoq atserneqarnissaanik siunnersuuteqartup siunnersuutaa ilanngullugu nalunaarutigineqassaaq.

Angajoqqaajuguit, alakkaanissannut tikilluaqqusaavutit. Periarfissaq taanna atorlugu aamma Ilinniartitaanermut ataatsimiititaliap siulittaasuata, Evelyn Frederiksenip meeqqerivik qanoq ateqalissanersoq avammut nalunaarutigissavaa.

Meeqqerivimmi ningiu Naja Marie Lyberth Lund unnersiorpoq meeqqerivimmi sulisussat tamarmik inissingajalersut. Taamaattorli aamma erseqqissaavoq suli meerarpassuit meeqqerivittaami inissaqartut, maannamummi 37-it tassani aallartittussatut nalunaarsugaatigineqarput, taamaalilluni meeraaqqerivinnut marluusunut meeqqerivinnullu marluusunut suli 27-it allatsissinnaapput. Naja Marie kaammattuuteqarpoq pingaartumik Akiani najugallit mikisunik meerartallit periarfissamik atorluaqqullugit qitornatillu assigiinngitsunik ukioqatigiikkaanut meeqqerivimmut tassunga allatseqqullugit.

Naja Marie qilanaarpoq meeqqat siulliit takkunnissaannut, pilersaarutimmi naapertorlugit meeqqat 19. aprilimiit meeqqerivissaminnut pulaartalissapput, eqqissillutik avatangiisitik nutaat ilinniaatigalugit sulisortaatik ilikkarluarniassamatigit, ilanngullugu erseqqissaatigineqarpoq meeqqanut misikkarissunut immikkullu pisariaqartitsisunut aamma sammisassaqartitsiveqartussaasoq.

Ataasinngorneq 25. april meeqqat inigisassaminnut isertissapput, kammaarartaatik sulisortaatillu peqatigilissavaat. Kingusinnerusukkullu meeqqat, angajoqqaat, sulisut aammalu qinikkat peqataaffigisaannik pisortatigoortumik ammaanersiortoqarumaarpoq.

